

Hestoria d'horros y paneres

en La última (20)

La Voz de Lena

por Xurde Fernández

Pasear pela zona rural del nuesu conceyu, o pola zona rural de cualquier conceyu d'Asturies llévanos a ver l'abandonu que lleva años sufriendo tolo que n'otra dómina yera perimportante pa vivir nesos llugares. Cases esbarrumbaes, fontes comíes polos artos, horros y paneres que yá nun cumplen nengún usu y que pasaron a meyor vida.

D'estos dos últimos, d'horros y paneres, queremos falar nesti artículu col envís de poner en conocencia de toos la importancia qu'éstos tuvieron antaño y lo bien que taría poder protexelos pa que quedaren pa les xeneraciones venideres

El diccionariu de l'Academia de la Llingua Asturiana define *horru* como Construcción cuadrangular que se pon enriba de cuatro pegollos y que s'usa pa guardar embutíu, granu, fruta. Y *panera* como Construcción rectangular de madera y pieces que se puen desarmar, que se pon enriba de seis o más pegollos y que s'usa d'almacén de granu, de carne.

L'orixe d'horros y paneres hai que lu buscar en tiempos antiguos pola necesidá que tenía la xente d'almacenar la cebera separtao del suelu y protexío de los ratones y de la humedanza. Un bon estudiosu d'estes construcciones como ye Inaciu Hevia Llavana (que recueye munchos de los datos qu'equí apaecen nel llibru *Les paneres de Maliayo*) conseña que son munches les teoríes sobre'l so orixe: romanu, suevu, centroeuropéu o propiamente asturianu.

Como conseña esti autor “los precedentes a los horros de tipu asturianu, o de caxón fechu con tables verticales nomaes colondres, sedríen modelos asemeyaos a les *cabeceires* gallegues y *espigeiros* portugueses, quiciabes de mayor tamaño, espardíos per tol norte ibéricu, fechos de sardu o vares texíes... Tamién otros colos qu'estos, al paecer, convivieren, exemplares de madera, fechos de xuru como los europeos y los lleoneses de paredes de tueros horizontales trabaos ente sí.

Por documentos medievales asturianos persabemos que yá nos sieglos XIII-XIV los horros teníen munchu valor na casería. Y va ser nesa dómina cuando paez ser que surden los primeros horros como los conocemos anguaño. Nun documentu de 1324 yá se fala de los engüelgos o esquines d'una pieza característicos de los nuestos horros.

Pero a finales del sieglu XV y entamos del sieglu XVI llega a Asturies el maíz. “Les colleches aumentaron espectacularmente, gracies también al meyor aprovechamientu de les tierres de cultivu, alternando estremaes producciones al cabu l'añu, ensin necesidá de dexales a barbechu”. Quiciabes yá esistía dalguna panera pero ye entós cuando se xeneralicen como solución “p'algamar mayor espaciu disponible na despensa”.

por Xurde Fernández Fernández, en La Voz de Lena
lavozdelena@yahoo.es

El nuevu cereal, pola necesidá de secáu, “enriéstrase y cuélgase de clavos, tornos o gabitos nos lliños, pero pronto apaecerá'l corredor, posiblemente, nun entamu, como deambulatoriu p'algamar a l'altura de los lliños, quiciabes fechu namás con unes tables posaes nes cabezas de los trabes y unos reyonos ente los tentemozos afitaos nellos, faciendo de barandiella. Estes cadarmes cencielles diríen espoxigando, a vegaes cerraes con sardu, otre con vares verticales fasta les más perfeches de barroteres, que miedren alredu de la panera, esceutu les puertes”. Al ser más soleyeros, col bon tiempu aprovéchense bien llueu pal maíz, como también p'ayos, cebolles, fabes...

por Xurde Fernández